

Gronda activitad sin il sectur d'asil

La Svizra bain preparada

DA LUCAS DEPLAZES / ANR

■ **39 523 personas han dumandà asil l'onn passà. La Svizra quinta er quest onn cun var 40 000 requirents d'asil. Il dumber è dependent da las mesiras dals pajais vischins. Ina prognosa è nunpussai vla.** Sch'ina persona dumonda asil en Svizra saja dependent da blers facturs, ha constatà *Mario Gattiker*, secretrari da stadi, a chaschun da l'infurmaziun da las medias dad ier a Berna. L'onn passà han dumandà 39 523 personas asil en Svizra. Quai è in augment da 15 758 dumondas en cumparaziun cun l'onn avant. Il mais da december è vegnidas inoltradas 4870 dumondas, 14% damain che il mais da november 2015.

Accelerar il proceder

Per dar dumogn a tut las dumondas d'asil vul il Secretariat da stadi per migraziun mantegnair il nov proceder d'accordar asil. En ina emprima prioritad vegnan tractadas las dumondas pauc fundadas. Per personas or da divers pajais che valan sco segiras vegn adoptà in proceder svelto da 48 uras. La Svizra fetschia diever consequentmain da l'accord da Dublin. Quai vul dir che personas che han gia inoltrà ina dumonda en in auter pajais pon vegnir returnadas là. Per la Svizra saja quest accord da gronda muntada, ha confermà Gattiker. Personas che n'han nagin dretg da dimora en Svizra vegnan repatriadas consequentmain. L'onn 2015 ha tractà il Secretariat da stadi per migraziun 28 118 dumondas. La Svizra ha accordà asil a 6377 da quellas personas. Quai munta ina quota d'acceptanza da 25%. Pendentas èn actualmain 29 805



Mario Gattiker, il secretari statal per dumondas d'asil, ha orientà. KEYSTONE

dumondas, u 13 038 daplì che l'onn avant.

Ilis novs centers sa cumprovan

La Svizra saja bain preparada er per in eventual augment dal dumber da requirents d'asil, ha sincerà Gattiker e fatg allusiun als novs centers d'asil da la confederaziun, sco a Turitg. En quests centers èn preschents tut ils experts per tractar las dumondas d'asil. Ilis requirents pon far diever da personas che cusseglian els davart il dretg d'asil. Quai haja sbassà il dumber da recurs e pussibiliteschia d'accelerar il proceder. Finamira saja da pudair tractar las dumondas d'asil en il decurs da 140 dis. La confederaziun vul augmentar il

plazs cun construir agens centers. L'ultim temp han confederaziun e chantuns gia augmentà la capacitat da domicili per fugitivs considerablmain. Per pudair dar dumogn ad in eventual augment massiv da requirents d'asil ha preparà la confederaziun ensemen cun ils chantuns in plan d'urgenza. En tals cas duain er vegnir mess a disposiziun bajetgs dal militar u dal servetsch civil. Actualmain stettian a disposiziun las capacitads necessarias per registrar il requirents d'asil, ha sincerà Gattiker.

Strategia d'integraziun

Impurtant saja ina buna integraziun da las personas cun ina lubientscha da pudair restar en Svizra. Ensemen cun il chantuns e las vischnancas vegnan elaboradas diversas mesiras da scolaziun e d'integraziun. En l'avegnir vul la confederaziun integrar daplì personas en noss'economia. In project da pilot vegn realisà ensemen cun las organizaziuns dals purs. Persuenter vul la confederaziun metter a disposiziun var 50 milliuns francs ilis proxims onns.

Prognosas

Prognosas sajan nunpussai vlas, ha constatà *Christoph Curchod*, manader da l'analisa per la migraziun. L'onn passà han 1,4 milliuns personas dumandà asil en l' UE, quai saja il dubel da l'onn 2014. Actualmain spetgian var 2,5 milliuns fugitivs en la Turchia. L'Uniun europeica saja actualmain surdumandada en vista ad in tal augment. Divers pajais han decretà mesiras per impedir l'entrada sur lur cunfins u schizunt limità il dumber da dumondas per asil. Las consequenzas per la Svizra sajan intscher-tas.